

佛山忠義鄉志卷三

建置志

內政

縣 司法 警察 團局各分局更練附 議會 自治會 保

安局 潔淨局 消防隊 水龍 水車

軍政

防軍 游擊隊 礮樓 礮臺 商團 忠義鄉團在鄉事志

交通

郵政 電政 路政 航政

建築屬內政

舊衙署 舊汎卡 鄉約

三王不襲禮五帝不沿樂而建置之事起焉夫所謂不沿襲者祇

佛山忠義鄉志卷三

建置
一
序例

在儀文度數之間大旨不外因時度地盡乎人治之道而已我國

自三代以來法制大備而道器悉具莫如周官一書泰西諸國得

其意而不襲其迹變通盡利馴致富強其名者禮俗信義多與中

土同比較得失亦判然矣光緒中朝廷銳意維新改設十大部命

戴鴻慈等五大臣考察政治歸成列國政要一書於是斟酌損益

擇其合乎國勢民情與我禮教不悖者次第推行天下拭目而觀

新政易不云乎輦用黃牛已日乃革操之過蹙國事遂不可問昔

人謂利不百不興害不什不除豈無為哉今則國體既變矣而政

惟由舊蓋猶有立憲之形式焉凡建置以內政軍政為大交通舊

隸兵部建築舊隸工部亦前志所有故彙為一志若教育則在地

方為學堂財政則在地方為賦稅農工商則在地方為實業事體

繁重故各為一志其他慈善祠祀風土逮於部政者亦建置之屬

既各爲一類不復雜陳此編志之大畧也吾鄉雖小部政所及幾於具體而微爰撰爲此志上溯本源明其沿革俾後之數典勿忘所自焉惟皇錫極建中於民禮時爲大何舊何新作建置志第三

縣

佛山隸南海縣治漢興縣置令以佐郡守爲親民官歷代因之自明以前知縣皆建衙省會臨治各堡佛山在清初有文武四衙駐防知縣因公始至逮民國元年政府以佛山爲南海適中地會垣既有多官宰治不宜同城乃移縣署於佛山大灣舊都司署而知縣之名亦改縣知事年餘復回會垣舊署三年部令縣知事更名縣長采三級制隸於省長道尹九年裁道尹直轄於省長今因之其歷任知縣縣長知事姓名任期別詳職官志

司法

佛山忠義鄉志卷三

建置
內政

二

司法之名昉自各國唐虞以還刑有專官清因其舊縣令亦得掌刑名逮光緒戊戌變新政改刑部爲法部立大理院各直省改按察使爲提法司遂開高等地方初級審檢各廳民國初元仍立法部各直省設司法司審判各所因之立法司法行政三權遂獨立司法定制以四級三審爲止縣得設初級審檢廳以監督推事監督檢察官主之南海設第一初級審判廳於會垣舊縣丞署迨民國元年一月再設第二初級審判廳於縣署是年八月又遷佛山舊同知署至民國三年六月裁撤併於廣州地方審判廳其歷任監督推檢各官姓名別詳職官志

警務

周禮大司寇設司虺禁暴諸官警政所昉光緒中詔變新法創巡警部後改隸民政部各直省立巡警道與警政佛山稱巨鎮於光

緒三十三年遂舉辦警察設警務公所於同興街立正局於大基頭惜字社學以一總辦統分局三分卡一佐以巡官巡佐巡尉巡長若干員一分局設鹹魚街二分局設昇平街三分局設舍人街分卡在新涌口後改總辦爲警務長以佛山同知兼任開辦伊始就地籌款同知張宏運措置未宜爲鎮紳所攻大府徇衆請揭參之警捐乃樂輸追捕游僧眾鬧署縣逐僧出境案遂定越辛亥民軍入境警察解散民國元年省設警察廳佛山亦遵章易局爲區署設正區於北勝街一分署於鹹魚街二分署於舍人街以署長分署長主之配以一二三等區員分卡仍前地制如日本之派出所民國二年更立三分署於鷹沙舊汎地以控上游皆統治於警察廳迨部令省置警務處地方警察隸縣知事遂改佛山爲南海警察第一分所署長更曰分所長分署則改稱分駐所分署長更

日所員各等署員亦改曰某等所員六年部令以所員易曰巡官各依其等分駐所以主任巡官統之是年十二月增第四分駐所於紀綱街轄中南部又增通津利步警察出巡八年十一月增設第五分駐所於鷹沙舊工藝廠專司沿河水上勤務用護舟楫此皆水陸警察沿革也警額分配轄地廣袤巡官員數與時變通亦非一定至柵下東頭橋亭邊鄙各舖迫於財力今未派警出巡現行犯罪赴就近分駐所申訴地方自治次第擴充警權伸張當在旦夕其歷任警務長官姓名任期別詳職官志

團局 十六分局
更練附

古有鄉官之制周禮一命齒於鄉里禮記鄉大夫以陽禮教讓則民不爭故黃霸爲潁川太守亦置鄉官所以勸民行厚民俗非止賓興已也佛山自明正統鄉老梁廣洗灝通洗光等二十二人立

團禦賊佛山鄉局始有鄉兵迨洗圭李舜孺諸鄉先生致仕歸立嘉會堂以處理鄉事諸先生歿鄉人建鄉仕祠祀之清順治四年平黃頭賊立忠義營旋廢十二年海賊肆亂復忠義營鄉夫工食均出鄉中賊平乃撤康熙元年且建忠義鄉約二年海賊反藉忠義鄉兵擊平之吳陳志均已紀載道光初海賊張保仔自平洲竄佛忠義官子孫復立忠義營賊遂退咸豐甲寅陳開踞佛山事平辦善後始設團防局鎮紳莫以枋王福康吳乃煌常川治事分設十六局故名總局丙辰英兵入粵命在籍紳士尙書羅惇衍太常寺卿龍元禧給事中蘇廷魁督辦廣東團練奏設四局佛山其一以在籍知府李應棠主之夷務平復爲團防局領十六局如故凡鄉村團練皆由官委佛山局係奏辦體制較隆重各鄉有事多倚以辦嗣是遞有變更在籍知縣張國經梁思溥曾另組局於鎮北

佛山忠義鄉志卷三

建置

四

內政

街光緒甲申法圖越南粵邊戒嚴大府檄行募勇以世爵駱天保主辦大令梁思溥副之局紳何增慶戴鴻憲梁世澂陳維表洗寶楨莫煜華先後協同辦事自紅巾亂後邊事孔棘前後四局皆臨時特設事平仍歸團局辦理凡歷屆團務以大魁堂爲辦事機關大魁堂者明時鄉人繼鄉仕諸公後建此以處辦鄉事亦靈應祠嘗款出納所也故自明以降鄉事由斯會集議決地方公益其款亦從是撥出光緒庚子聯軍入京粵督李鴻章又令佛山辦團乃募勇分防各舖餉項均由大魁堂撥給十六局另集民團以作後備每月由文武四衙按行各分局閱操名曰會哨旋以總兵鄭紹忠所部安勇營制最良乃改團練勇爲安勇設之數年卒以大魁堂疊次辦團公款告竭遂裁自此團局祇任排難解紛保良攻匪與維持風化而已民國元年民軍入境廢團局十六局亦同廢設

鎮議會二年議會散團局復更名保衛團局遵內務部地方自治令也其職掌得設團兵以保衛地方輔官力所不逮教育慈善風教衛生其大端焉設局長一佐之以局董無定員遵現制地方自治團體無議會者以保衛團局為謀地方公益純一機關焉其十六分局廢後不復立各舖有事均由保衛團局處理而其當日設立規制不無可采故仍附各分局轄舖表於後

十六分局轄地表

綏字局 汾水舖

靖字局 大基頭舖

安字局 福德舖

戢字局 社亭岳廟
真明舖

聯字局 富文舖

合字局 沙洛舖

守字局 觀音堂舖

禦字局 潘涌鶴園舖

果字局 彩陽仙涌
醫靈舖

力字局 嶼岐明心
耆老舖

佛山忠義鄉志卷三

建置 內政 五

稽字局 紀綱石路黃
傘豐寧舖

巡字局 柵下東頭舖

永字局 祖廟山
柴舖

遠字局 橋亭明照
錦瀾舖

平字局 鷹嘴沙

定字局 文昌沙

更練

陳志載忠義鄉二十五舖各有更館開樓其更夫間夫統計三百餘名工食出自各舖居人則更練之設即古鄉夫也佛山有鄉夫自明景泰時始自是各舖均設更練後改為二十八舖更練亦添設每舖或二三人四五人不等視其地之繁簡為衡每舖有練館或向有公產鄉約駐紮或租賃民房棲止或數舖相合而為一練館其工食皆月向民居籌給更練向歸五斗司巡檢召充民國則屬於保衛團局管轄多以土著人充之助官兵以捕治盜賊藉寄耳目盤查奸宄於地方不無小補創設之初足以禦海賊捍地方

雖今非昔比而成規具在不可廢也現練館所在地表如次

柵下東頭舖在後廟街天

明照舖在大橋頭

錦瀾橋亭舖在村尾保安街豆腐巷

仙涌醫靈舖在仙涌下街

彩陽耆舖在大口

社亭舖在藥王廟後鄉約

老嶼岐舖在鄉約

明心舖在太上廟側

真明舖在三聖宮側

豐寧舖在全安里

黃傘紀舖在香街

山紫舖在高基鄉約

祖廟舖在協天勝里鄉約

福德舖在高地下巷鄉約

岳廟舖在彌頭關帝廟側

觀音堂舖在大墟鄉約

鶴園潘涌舖在鶴園社前鄉約

汾水舖在葛寧坊

大基舖在新勝坊鄉約

沙洛舖未設練館

富民舖在盤古廟前

論曰鄉之壯丁嘗勇於自衛矣當明景泰時破強賊如驍勁之師

佛山忠義鄉志卷三 建置 內政 六

非有訓練之素也非有將弁之督也又非有城池之可恃也徒以忠義激發父兄為帥子弟為卒徒一鼓而賊懼再鼓而賊傷三鼓而賊走矣執干戈以平寇難豈必隸名於戎籍哉厥後李大司農有忠義營官之請領兵二十餘名官兵實肇於此而地廣兵少控制未周不無藉於鄉夫之助未幾殺黃頭賊擊海中流賊助石碇殺賊率鄉夫也鄉夫之可用固如是哉今鄉之邊腹皆官兵森列可謂有備無患矣尚奚需於鄉夫而仍不廢之者殆古人士兵民兵之意夫人生長是地易於稽防古人嘗倚之以辦賊況勇功屢見於疇昔者哉作其氣而策以勤精其選而汰厥惰斯官兵坐鎮而安矣留意地方者庸可忽諸陳志

按陳志論列更夫甚詳惟今昔異殊現在更練難比美於鄉夫矣存之以備沿革

議會自治
會附

光緒乙巳詔派戴鴻慈等五大臣出洋考察憲政翌年定預備立憲各直省城鎮鄉得設議會以實行地方自治宣統二年佛山遂開鎮議事會及董事會先由縣令派員調查選民用投票法選舉各會員復由會員票選會長職員關於地方之預決算稅入附加教育慈善交通衛生風化諸端得提議之以請求官廳執行議員任期爲兩年每年留半選半議會則設於貴縣街廣福醫院初舉會長爲戴鴻惠後廣東設諮議局鴻惠充議員以黃金韜改充輔以議員三十一人董事會長爲林超常輔以董事二人名譽董事八人民國元年復設鎮議會於祖廟大魁堂其制仍仿前章會長爲黃伯乾吳荃選會董馮鑑波等隨於民國二年奉令解散今不復設立矣

自治會

官之治民不如民之自治故周設比閭族黨州鄉之制漢立三老嗇夫宋置保甲鄉約皆民治濫觴清光緒朝民政部奏定地方自治章程頒行直省爲立憲預備於是府廳州縣各鄉鎮得設自治會以佐官治之不逮我鎮士商遂在田心書院開設會所以光緒三十一年成立稟由地方官咨部在案遵章酌納自治費得爲會員共二百餘人推馮熙猷爲會長黃紹機鄧林芬張蔭楡副之有幹事員分司財政文牘及調查事宜皆無俸給宗旨在研究自治期於實行凡本鎮學務衛生道路工程農工商業慈善公共營業等皆地方公益是謀而地方官仍監督之時入會者頗衆攷其成績首先條禁花子強乞與創辦簡易識字學校兩所民國元年鎮議會成立地方自治歸議會處辦是會遂廢夫以本鎮人而辦本

鎮事情親地近功效易見惟限於經費斯時未能於自治範圍各事大加擴充亦勢爲之也

保安局

民國元年胡漢民陳炯明先後任粵都督以國體已更不無因革乃廢所屬鄉局及紳士名稱官衙匾額旂杆等類皆除去另圖規畫俄而盜賊蠶起各鄉乏士紳主持乃令各屬設保安局取合議制因各地議會未立不能不設地方自治機關以求救濟我佛保安局亦乘時設立初革命軍興粵督張鳴岐逃本鎮地近順德樂從地方民軍取道佛山絡繹不絕擁至萬善堂分據警局及各衙署附和愈衆商會供給膳費每日多至五百圓人心惶惑變恐不測會董霍子常林恩海陳藹人等建議以通令得設保安局我鎮不能不立局以保公安遂由商會主辦舉定辦事人員稟請官廳

設局先借三界通衢參藥行會館爲辦事所定名佛山保安公局籌款之法每科銀五圓得三百餘人定每日午刻爲常會嗣以人多地狹遷舊都司署票舉李佩鳴爲局長馮熙猷梁彞伯副之何陶村掌財政監督出納爲勞梓棠孔竹雲等五人其餘舉定各員皆有常職分途勸捐得款四萬二千九百餘員另由釐局警局撥交二千餘圓而犒軍等費由萬善堂開支壹萬九千九百餘圓商會開支壹萬八千七百餘圓存銀六千三百餘圓後由布行續捐八千四百餘圓各街商富共捐銀二萬七千四百餘元以軍無統紀來日大難遂呈請都督派員來佛分別裁遣散給恩餉卽委陸蘭清爲蘭軍統領編列歸伍仍由局月給餉銀七千二百圓至壬子二月底止其各營廠先後開辦費用及散給恩餉等需至萬圓賴當時抽得租項一萬七千八百餘圓稍資接濟後何江領軍分

紫衫陽堂舊汎旋遷惜字社學軍用供給亦達數千費用浩繁已可概見民國二年縣知事盧梭魂闕都司署爲縣衙門諸事略定始議撤局自開局後所支賞卹及軍需薪餉數復逾萬而當玄黃易運有局爲之鎮懾使市廛不驚紳富樂業用費雖多保存實大計是局設立於辛亥冬撤於癸丑夏前後不過廿四月計刊刻徵信用款至九萬餘圓皆賴地方紳商踴躍捐助至鎮議會成立軍隊收束始行裁撤餘款則撥議會開辦費七百餘圓墊游擊隊餉三千元大局遂定

按保安局係臨時設立事畢卽裁故附團局之後

潔淨局

潔淨爲衛生大端亦內政所當講求各國多隸衛生警察範圍佛山之有潔淨局自民國八年合鎮紳董呈准南海知事何惺常開辦以再附加花捐每月撥百元爲補助并酌收居民潔淨費初設局於福祿大街旋遷真明舖三聖宮廟道開辦以來皆由紳商招商投承每多虧折至十年九月由警察分所收河辦理今仍之

消防隊

消防名稱原出日本卽救災之意其任務凡遇天災地變及人爲之危險均須出救不止救火已也本鎮消防隊於民國十年十二月警察分所長黃心存奉縣令籌辦至十一年三月成立第一隊於三界通衢編制之法設隊長一員警長一員消防警察四十人統歸分所長管轄駐紮地點設有望樓高十丈由警察分班瞭望遇有火警日懸旗夜懸燈分別地點標識經費月需五百元按警費多寡附加商店月收一角至四角住戶分甲乙等月收一角半角預算至十一年八月可成立第二隊如款項漸次擴充至第三

隊本鎮煙戶稠密火警時聞今於水車水龍外添設消防隊則救火較前迅速且遇有塌屋及其他災變亦藉以救援於人民生命財產頗有關係誠善政也據警局開報

機器水龍

佛山未設消防隊以前其救護火災舊恃水車光緒中汾水舖十五街始置機器水龍於八間樓民國八年正埠等十六街復設機器水龍於正埠其水喉延長至福祿里等廿餘街遇有火警可開喉注射亦滅火良器也

各舖水車

水車之設由來已久其制各街水車遇有火警每店舖派伙伴一人為之牽櫃至火場其取水舉喉各有定職咄嗟立至救災卹鄰各逞其勇誠可法者各舖水車公所地址列表於後

佛山忠義鄉志卷三

建置 十 內政

橋亭舖公所

設南濟後街道光三十年建

社亭舖公所

設藥王廟前街宣統三年建

真明舖公所

設線香街

普君五街公所

設鴨仔廊

豐寧舖公所

設新安街國公廟前

黃傘舖公所

設居仁里光緒七年建

祖廟舖公所

設祖廟大街同治八年建

福德舖公所

設金線街即永康公所咸豐六年建

書籍行公所

設譚巷書院光緒三十一年建修

鶴園舖公所

設永茂巷光緒三十年公正兩約建

潘涌舖公所

設先鋒廟同治十年建

觀音堂舖公所

在大墟華光廟

大基舖公所

水車二架一在華慶街一在大王廟

汾流街公所

設汾流街綢緞行會館

弘仁四街公所

設天后廟同治二年建

豆豉巷公所

在本街鄉約

畸吟街公所

設福森街光緒三年建

盤古六街公所

設盤古廟前

承龍街公所

設本街鄉約

鷹嘴沙公所

設張公廟

北勝街公所

設三界廟內

文昌沙公所

設關帝廟

以上內政

防軍

佛山爲中國四鎮之一商賈雲集盤奸緝盜保護宜周明設忠義鄉兵民自爲衛無論矣清初設游擊分防佛山康熙中改游擊爲右營都司隸廣州協佐以千總置彩陽堂汛爲佛山官軍駐紮之始更闢大基鷹沙柵下水汛大灣祖廟陸汛自新廟至弼頭設子口十二各立汛兵星羅碁布防務斯備以綠營防佛者百餘年咸豐甲寅紅巾亂作綠營力不足禦賊時佛山屠行有釐金捐用充全省軍實鎮紳乃請當道截留緒釐以設留防佛勇五百名可之遂將勇額分防各舖以助綠營光緒中制如舊及岑春煊督粵奉朝命廢綠營佛山各汛與子口綠營兵皆裁西征命下岑督令善後局撥款窮於羅掘留防佛勇亦裁其半數未幾餉亦停給勇將解散適粵增雜捐鎮紳請准將雜捐餉項撥給勇費方繼續設立

佛山忠義鄉志卷三

建置
軍政

十一

越數年雜捐停留防佛勇亦隨而消滅矣綠營旣廢佛山遂無永久防軍省憲乃改派巡防營以鎮之兵力猶未足也五斗司巡檢陳徵文協商同僚設立文武四衙緝捕勇餉精官任之助巡防營以衛各舖光緒末開辦警察四衙勇遂撤鎮中團練總局設有安勇分防未辦警察各舖後餉絀改辦警察游擊隊仍紮安勇防地其詳別載游擊隊章制民國初龍濟光爲粵督軍飭佛山設碉樓以濟軍防守之濟軍去粵繼以桂軍桂軍調防以福軍補之其大營皆在舊都司署軍隊則撥守各舖邊隘與碉樓然移調無常兵額靡定故自清初設防軍以來皆兵備森嚴雖足鎮懾奸宄惟主客異勢非有主軍爲之鄉導不足以盡捍衛之利所以佛山軍政仍以主軍爲主體焉

游擊隊

民國初鎮人以汾水等五舖既設站岡警察餘柵下等十九舖防守尚空而省撥防軍移調無常不足以奠地方乃由闔鎮紳民呈准設警察游擊隊以分防十九舖仿留防佛勇制而變通之設總隊官副隊官小隊長等職定兵額五百名其餉項以撥佛山花筵捐歲收六成爲主輔以屠牛捐十九舖租捐純以地方收入保護地方治安佐警察之不逮法甚善也惟總隊官初制由縣委任紳民得保薦之迨李耀漢任省長時始改爲省長委任自此地方紳民不能自領其軍而兵額亦時有裁減事權又一變矣

碉樓

民國四年龍濟光爲粵督軍調濟軍防佛山以鎮地遠闊控制綦難乃面諭紳商籌築碉樓於邊隘各地撥兵駐紮用資鎮懾紳商踴其議抽房捐一月主客各半得款若干緡不足由大魁堂商會

佛山忠義鄉志卷三

建置
軍政

十二

義倉借墊築成九座數月而工竣以濟軍守之有警則互相策應及濟軍去福軍接防地方頗收防衛之功亦古軍制烽火臺遺意也又新涌口舊都司署後一座由濟軍旅長段爾源另行籌款添築其燒灰爐一座則由坊衆公建共十一座按其地址表列如下

文塔腳一座

平政橋一座

白花社一座

通濟橋外一座

城門頭一座

新涌口一座

燒灰爐一座

石雲山一座

橫塘基一座

文昌沙一座

火車頭一座

佛山碉樓落成記

里人吳荃選撰

不通時勢之變者不足以策治安不審土地之宜者不足以言守禦我佛山嶺南一巨鎮也據省上游當西北孔道村落拱衛雖無城池之可守而四悉潛伏形勢家指爲福地者殆謂是歟明正統間海賊黃蕭養倡亂擾及南海番禺順德諸鄉鎮人梁廣等設立木柵以資戰守卒以潰賊遞及清初廣置營汛附以煙塾望樓爲防禦計乾隆中葉海宇昇平木柵望樓日就傾圮四海無事迄未興修迨乎武漢事起各省騷然國民軍自會垣

入佛如升虛邑龍上將軍濟光奉中央命督軍粵東中分麾下
之兵填防佛地境內以庇未幾土匪分五路攻佛通濟舊汛當
其衝廠械猝被焚槍統領李嘉品分設迎擊賊敗退四陲獲安
此民國三年九月事也龍上將軍志後懲前網繆未雨為曲突
徙薪計檄行南海令集鎮內紳商而謀之曰戰必資守兵家之
常策也木柵既不能持久望樓又未足制敵無事可備瞭望有
事足恃攻守莫礪樓若致礪樓石室也兵燹之後元氣未復若
驟與木石恐重民困今以磚易石則費廉而工省既順時勢又
合土宜僉曰善於是鳩工庀材按戶捐助經始於秋九月蒞事
於冬十二月而壁壘聿新樓既成余為文以記其事余思天下
之事其所患恆出所備之外當時辦團保置警兵所慮者內地
宵小而已他無慮也駐濟軍設游擊所慮者餉械不敷而已他
無慮也乃以至銳之兵至精之械當外匪猝至曾不獲奮其武
勇一鼓而擒之夫豈思慮之所及哉雖然向使有險可守處處
設防互相策應則外匪無從竄入外匪不能入則槍械不致被
掠勇廠不致被焚械不掠廠不焚軍士可藉以殺賊今竟有兵
而難用其武有械而適以資敵莫非昔日之門戶洞開藩籬盡
撤有以致之也易曰王公設險以守其國傳曰不備不虞不可
以師其龍上將軍之謂乎樓之成也檠戟連雲上沖南斗旌旂
耀日下澈汾流而笳聲角影復與虹梁蛤戶流水漁歌互相映
答蒼茫迥合首尾相貫如龜蛇龍虎得武侯八陣之象意者其
將有忠臣猛將崛起其間歟抑又聞之兵書李靖作十二陣大
黑大赤當午子青龍白虎當卯酉左突右衝當寅申前沖後沖
當巳亥推凶決勝當辰戌破敵先鋒當丑未今礪樓所在應乎

佛山忠義鄉志卷三

建置

三

軍政

地支異日當有拓地維并萬國跨六合者皆於是樓開其先歟
夫安不忘危者當軸之責也詰奸弭盜者軍士之職也吾願駐
斯樓者枕戈待旦刁斗無驚以無負我鎮人千城之寄而長蒙
福地之庥也是為記

按洞谿織志載松潘古冉駝地人居累石為室高者至十

餘丈乾隆朝大小金川相繼叛亂築礪以抗官軍數年而

後平之迨嘉慶間川楚教匪起事官軍倣其法沿邊築礪

遏賊而教匪平成同間捻匪四竄直隸山東河南一帶行

堅壁清野法所在築礪賊至則入保使無所得遂蹙之海

隅而東西捻亦平師敵人之長以制敵善兵者不諱也佛

山平夷洞達無險可扼柵下沙口礪臺已圯所恃以固吾

圉者將惟礪是賴水陸異宜以守以望臺不如礪輔以遊

擊之兵用電話報警呼吸可至諸礪錯峙勢如常山設守

之善無逾於此事關設險爰引申其義附吳記後礪制見

魏源聖武記及李鴻章平捻記余虎恩行軍日記

礮臺

環鎮皆水也港汊紛歧防衛費力清初屢受海賊侵擾嘉慶十四年海氛不靖鄉人乃建柵下沙口兩礮臺以爲堵禦逮咸豐時洋人入粵內河防守賴爲犄角未幾沙口礮臺圯柵下礮臺亦於光緒改建藥庫佛山礮臺至今無一存者告朔餼羊我愛其禮願有地方者留意於水上防務焉

商團

佛山商團宣統年間開辦公所在三界通衢另有分團公所四間公推梁翼伯爲團長王仲第繼之至民國十年再舉黃頌陶爲團長公所遷往豆豉巷萬壽宮現在團友三百餘人各領長鎗一枝隨時召集操練操場在大基頭育嬰堂對面民國十年創建遇有

佛山忠義鄉志卷三

建置
交通

十四

盜警火警水災均出隊保護頻年亦著有勞勩云

後立忠義鄉團
詳鄉事補篇

以上軍政

郵政

置郵傳命及立驛使乃郵政所自仿清戊戌變法後立郵傳部派專使出洋考查郵政與萬國郵政會締結同盟條約於是中國郵政大備佛山郵政局亦於光緒二十七年設立初在汾流街民國元年遷北勝街定爲二等郵局更設支局於汾流街與普君墟近更以佛山商務繁盛於缸瓦欄立一等郵局北勝街局改爲支局均收寄平常快遞保險信件及收寄包裹匯兌銀兩計所轄三支局二十六代辦所信櫃四十處售郵票所三十六處投遞郵件日凡七次且兼理郵政儲金視昔之紙書迢遞馳驛加緊尙虞洪喬者有難易之判焉

電政

電學創自歐西始則用之工業西歷一千八百十一年德國人森米令始創電信機一千八百三十七年德國人士堂奚路方實地安設施之軍用由是軍情傳達瞬息萬里各國推行皆設專官以司電政我國於光緒中首立電政大臣於京師各直省設電報局後立郵傳部電政隸之民國初元改郵傳部爲交通部設電政司以轄各直省電政局今如其舊佛山電報局創於光緒十年春其管轄綫路東至廣州西至三水南至江門與各地電局互相聯接電費分四等徵收一等多屬官電最爲迅速餘則按等以定遲速莫不捷如影響焉又電話亦電政之支流佛地尙未設立公司惟警區礮樓消防所均設電話商場之有支店者多自行設綫供人借用風氣日開已

商辦電燈公司
別見實業志

佛山忠義鄉志卷三

建置
交通

五

路政

中國鐵路古無專門自光緒間立郵傳部各直省始興築鐵路以利交通粵漢鐵路亦乘時而起其支路名廣三鐵路以佛山爲中樞初名三佛鐵路光緒二十四年由鐵路督辦大臣盛宣懷駐美公使伍廷芳與美國合興公司訂約借款築路時論以佛山爲中國名鎮商務最盛決議由省至佛一段先行建築乃於光緒二十七年正月開築十月告成通車此三佛路名所由來也收入旣增商務頓旺乃加工趕築至三水一段翌年告成由省城至三水全路卽通車矣嗣因合興公司以路股分售比國有違條約乃收回自辦將合同註銷贖美金六百七十五萬圓與美國以三佛支路名稱不合改名爲三省鐵路遂爲完全商辦民國二年湘鄂兩省原有股份收歸國有交通部派羅崇齡爲總辦接收一切建築營

業收支粵股則由股東舉董事一人爲代表經理分權治事時交通部又以三省鐵路名稱未宜易名爲廣三鐵路設管理局於石圍塘此廣三鐵路官商合辦之概也後又更總會辦爲正副局長局制既改權限每有爭持乃明定官股占七之四商股占七之三仍未足以調和也八年粵省自主與北京交通部脫離乃重訂章程官商共同負責於是糾紛始解惟各國鐵路名家多論列廣三鐵路由省城至佛山一段路綫最短而收入最豐爲世界鐵路之冠苟加以改良將不知如何優勝矣

航政

舟楫之征古無聞焉自國用日促乃徵及船戶光緒間粵督岑春煊設船捐局徵收汽船舟楫牌費蛋民不服幾釀事變後合省同鄉京官聯同御史奏罷之爲航政濫觴迨郵傳部立以海禁日開

佛山忠義鄉志卷三

建置
交通

六

汽船與內河船隻不可無專官以管理之也遂立航政司民國初年改郵傳爲交通部設航政司各直省立航政局廣東初改交通司後更名航政局其職掌則凡有輪船帆船鄉渡及內河小艇均須赴局注冊領照按其等次年納牌費始准開行凡裝載重量及經行水綫均有規章不能超越違則罰以緝撤其照禁其行駛各繁盛商埠均設有航政分局南番順陳村航政分局設於佛山初在文昌沙後移於北勝街警察第一分所以遙制各地其權責則遵照部章有航政局而船戶遂不能不受其盤查約束欲如前之來往自由而不可得矣

以上交通

舊衙署

佛山五方雜處清設文武四衙以爲坐鎮法良意美今雖盡廢而

設官分職沿革宜詳爰節錄舊志以存掌故焉

廣州府佛山海防捕務同知署在十字路屬豐寧舖雍正十一年巡撫楊公永斌奏請添設佛山同知彈壓十堡劇鎮十三年改營岡都司署為分府署移都司署於游擊舊署

五斗口巡司署在縣南平洲堡明景泰三年置嘉靖八年移治磨

刀石後又移治佛山鎮尋又改置平洲曰平洲巡司大清一統志查磨刀石即

今石縣南西淋都平洲堡明景泰三年巡撫揭稽同三司奏設粵頭鄉

記按平湖即平洲

縣志巡司署向在佛山明景泰三年建雍正十一年新設同知彈

壓劇鎮乃移司署於平洲堡或移駐佛山皆僦民舍以居無定所

按今佛山並無五斗口司舊署而邑輿圖云司署舊在平洲堡今

紀綱街五斗口司公署原係福山書院通鄉捐建以課童蒙者自

佛山忠義鄉志卷三

建置

七

巡檢金元爵以來相沿借住其實非署也

碑記附教育志書院類

佛山都司署在觀音堂舖大灣地方原為游擊署後裁游擊改設

都司今為都司署

佛山千總署在彩陽堂舖彩陽營雍正元年建規制未備道光九

年千總劉大彰捐貲修葺並買署前民房餘地改建照壁及東西

柵門又建祠一所祀本營無依兵丁木主於東柵門外照壁旁舊志

及採訪冊

論曰佛山嶺南巨鎮也商賈輻輳握西北江上游清設文武四衙

以治民事緝奸宄民樂其居商安其業而衙署之据佛山險要者

莫如同知及都司兩署為四鄉往來孔道水陸交通要津設險之

義於是乎備逮民國元年佛山文武四衙俱廢官署且列為官產

招商投變控制又為一變時論惜之雖滄桑遞變何有於設官而

治安賴以維持似難盡棄況現在警區防營多僑借民居不無偏向一隅變通盡利防守盡宜深賴司牧焉

舊汛卡

清制重綠營遂於直省各地設立汛卡以綠營兵分防之佛山遂有水陸汛卡及各子口之設其水汛多為順德協分防陸汛則廣州協分防也光緒中朝令廢綠營佛山各汛卡子口兵盡撤今更將各卡汛子口營房盡行投變改建民居舊跡湮矣而分段設汛首尾絡繹前人亦具有深意爰存其地址俾臨時設守者有所考焉表如下

鷹沙水汛一座

煙塹一
望樓一

大基尾水汛一座

煙塹一
望樓一

柵下水汛一座

煙塹一
望樓一

大灣水汛一座

煙塹一
望樓一

祖廟陸汛一座

煙塹一
望樓一

大灣都司署汛

佛山忠義鄉志卷二

建置
建築

十六

新廟口子汛

勝門頭口子汛

新涌口口子汛

通濟橋口子汛

大塘尾口子汛

汾陽里口子汛

經堂口子汛

朝市口子汛

山紫村口子汛

龍母廟口子汛

大基頭口子汛

彌頭口子汛

彩陽堂營汛

鄉約

鄉約之設始於明代各舖有事則集鄉約以議決之即今之各地集議所及公所也皆為公建後用以駐紮鄉夫遂多為各舖更練住宿所而二十八舖非皆盡有鄉約今所存者表如下

柵下舖在天后廟側

祖廟舖在協天勝里

福德鋪在同安大街

東頭鋪在東頭街

潘涌鋪在快子街

鶴園鋪在鶴園大街

橋亭鋪在保安街

山紫鋪在高基街

大基鋪在新勝坊

觀音堂鋪在大墟街

嶼岐鋪在大口社

以上建築鄉約亦練館之屬與內政更練條參看

按建築本屬內政以國工為大惟近年無甚興作官署各營汎已變賣餘亦分駐軍隊非復舊制而故址所在例得照存故自為一類附本志後

論曰建置者憲政之統名也孟子曰徒善不足以為政徒法不能以自行曲臺記曰文武之政布在方策其人存則其政舉其人亡則其政熄此古今中外不易之定理而人之存不存則仍視其政

佛山忠義鄉志卷三

建置 總論 十五

之舉不舉近人張季直著變法平議謂立法之地以治人生治法行法之地以治法生治人旨哉言乎故夫有周公之才之德然後可制禮作樂今之立法者才德不及周公甚且借法以營私利法且不法尙何治人之可生哉夫制作之才非無間世一出而立法之地每不勝其救過之心故雖有治人亦不能行其治法同光間亦嘗言變法矣賢如曾文正李文忠及郭筠仙侍郎主持尤力而膠執成見者不曰用夷變夏則曰擅更祖制隨聲附和如塗塗附自愛之士憚於清議不敢受任以致法立不行或行未竟而前功亦棄遂益為持議者所藉口則非法之過而不行其法之過也曾文

正督兩江奏辦海防建設諸局廠規畫備至而本集不錄一疏遺子紀澤遊學外洋家書亦不載隻字編輯者懼招謗也辦理天津教案陞辭日有寧可得罪於清議不肯論憂於君父之奏可謂忠矣李文忠移駐天津廣籌戰備使才將才於是乎出諸所建設與文正同而言者傾之不已吳汝綸為撰墓志銘謂公傾國危今何如哉郭筠仙侍郎使西紀程尤遵指摘至不敢回京覆命侍郎故

祭酒王先謙羅列行實奏請宣付史館立儒林傳樞臣擬旨謂所著書物議沸騰即指使西紀程一書則未見集中純粹之作也嗚呼以諸公之賢遭謗至此若吾粵之丁日昌陳蘭彬又不足道矣

創造伊始用人未必盡能當選而其法卒不可易善乎沈文肅之言曰不得因用人之不善而歸咎於立法之不良誠慨乎其言之也則終無以易變法平議之說也

沈與曾李郭同主張變法其在閩設船廠卒收海軍之用而謗議略少者以沈為林文忠之婿清風亮節海內欽佩故克保令名而條奏海防中有折衝資行陣則武科可以裁事權貴專一則與總督同城之巡撫可以裁數語亦被攻擊以上各注據曾文正集光緒初海防籌議彙編平

髮紀略近年邸報及諸筆記昔宋神宗志復燕雲王安石為之變法皆富强大計司馬歐蘇諸賢交攻之乃用呂惠卿輩故法未行而弊先見其實荆公新法後世亦多做行即就當呂而論有諸賢

言之以為是及荆公行之反以為非者有事體相同在彼為是在此則非者臨川章汝明序其書言之最詳於諸賢之自相抵觸剖晰靡遺持論至為平允

略曰抑其為議有一人之口而自相抵觸如蘇頌演嘗言官自借貸之便而乃力詆

佛山忠義鄉志卷三

建置 總論 三

青苗錢之非司馬公在英宗時嘗言農民租稅之外當無所與衙

前當募民為之而乃力詆雇役之非蘇東坡嘗言不取鬻武則無以通西域西域不通則契丹之強未有艾而乃力詆熙河之役之非又如己非雇役不可行而他日又力爭雇役不可罷之類是也

有事體相類自來行之則以為是公行之則以為非如河北弓箭社實與保甲相表裏蘇東坡請增修社約并加存恤而獨深惡保甲法之類是也青苗錢之放專為資業貧民不使富民乘急以邀

倍稱之息司馬韓歐諸公既極言此錢不可放則亦求所以抑兼并而振貧弱可也乃徒訟此之非利而不顧彼之為害何邪蘇東坡論雇役至謂士夫宣力之餘亦欲取樂若廚傳蕭然則似危邦

之陋風恐非太平之盛觀似此之類既非真知是非之定論亦非曲盡利害之詳謨宜公槩謂流俗而主之益堅行之益力也文六

千餘言剖析立法之意尤為詳盡茲特摘錄中間一段以彰公道荆公文章經濟一時罕與倫比御纂七經亦多引用其說此知人所以貴也

是諸賢之攻新法非攻新法也攻荆公也乃摑摑三不足之言文致其罪詞人騰之詩歌史官獵人記注不審事實官禮蒼生陳因盈牘蓋千百年於茲矣以今方古當日變法諸臣之獲謗與荆公將毋同光緒中鄰氛日逼國勢愈弱始有預備立憲之詔舉會李郭沈諸賢見之施行者脩而明之京城立十大部於是有

立法之地畫分直省爲行政區域卽行法之地也而中更多故所
謂立治法之人與夫治法所生之治人未屢世望各國不無訾議
嗚呼昔有其人而法不行今有其法而行法或不如前人豈不重
可慨哉繼曾李郭沈者斷推張南皮手撰合肥壽序疏舉新政標
本並澈海內傳誦而在詞館時仍封故見伊犁之事抗疏
主戰責備合肥及出任封圻卽翻然變計與合肥建築蘆漢幹路
拳匪之亂聯章拒命保障東南大局遂定公忠體國毋固毋我賢
者當如是已夫憲法所以立國爲古今中外不易之理吾鄉亦行政範
圍自應照事收載俾有稽考至現行之有無滋弊將來如何效果
不具論但論其憲政之應行者於此篇發其凡教育實業同慈善
同 慈善卽周禮
保息之政輿地之申畫水利之蓄洩賦稅之正雜職官選舉
之相爲表裏祠祀氏族之各有等威凡諸建置並同